



Isumaginninnermut Suliffeqarnermut
Nunamullu Namminermut Naalakkersuisoq

isn@nanoq.gl

Ulloq: 12-06-2023

J.nr.:01.38.01.03-00178

Immikkoortup 103-p ataatsimiititaliamit suliarineqarneranut atatillugu allakkatigut apeqquteqaatit

Ilaqutariinnermut Peqqissutsimullu Ataatsimiititaliaq ataatsimiititaliap UPA2023/103-imik suliarinninneranut atatillugu matumuuna tulliuuttunik allakkatigut apeqquteqarpoq. UPA2023/103-p qulequtaraa:

"Kommuunit oqaloqateqatigalugit inuit napparsimanermik pissuteqartumik suliffissarsiortut ikiorsiissutinik qinnuteqartut qanoq pitsaanerpaamik aalajangiinissap tungaanut aningaasartuutiminnik akissaqarnissaannut sullinneqarnissaannik qulakkeerinninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut."

Immikkoortup siullermeerneqarnerani Naalakkersuisut akissuteqaataanni immikkoortoq ataatsimiititaliamit innersuussutigineqarpoq:

"Inuk sulisoq aamma napparsimaneq pissutigalugu suliffissarsiortunut ikiorsiissutinik pisariaqartitsisoq pillugu naatsorsuutigineqarpoq, napparsimalerneq sioqqullugu nalinginnaasumik akissarsiaqartinneqartoq. Inuk suliffeqanngitsoq, suliffissarsiortunut ikiorsiissutinik pisartagaqareersoq aamma napparsimalersoq, suliffissarsiortunut ikiorsiissutinik suli pisartagaqassaaq. Naalakkersuisut ersarissumik naatsorsuutigaat, inuk kinaluunniit napparsimaneq suliffeqannginnerluunniit pissutigalugu kingusinaartumik pisartakkanik tunineqassasoq".

1. Kommunini tamani suliffissarsiortunut ikiorsiissutinik qinnuteqartartut ukiumut inuit qanoq amerlatigisut peqqutigineqartunilu nappaammik, suliffissaarunnermik imaluunniit angerlartitaanermik peqquteqarsimappata paasissutissat taakkua tamaasa immikkoortunngorlugit paasissutissiissutigeqqullugit Naalakkersuisut qinnuigineqarput.
2. Siuliini taaneqartuni qinnuteqartoqarsimatillugu sulianik suliaqarnermi piffissaq qanoq annertutigisoq atorneqartarsimaneersoq aamma assersuutigalugu kræftimik nappaateqartut imaluunniit aaqqissinnaanngitsunik allaniluunniit inuup sulisinnaassusaanik annikillisisumik nappaateqartut qinnuteqarsimatillugit piffissaq suliamik suliaqarnermut atorneqartartoq assigiinngissuteqarsimaneersoq paasissutissiissutigeqqullugit Naalakkersuisut qinnuigineqarput.

- Tamatumunnga atatillugu pissutsit suut sulianik suliaqarnermi kinguarsaataasinnaanersut Naalakkersuisunut nassuiaateqarfigeqquneqarpoq.
 - Tamatuma avataatigut sulianik suliaqarnermik aqqiissutissanik qanorlu iliorluni sivikillisaataasinnaasunik suliniutissanik Naalakkersuisut saqqummiusseqquneqarput.
3. Itigartitsinerit (apeqqummit siullermit) qassiusimani ilisimatitsissutigeqqullugit Naalakkersuisut qinnuigineqarput.

Siuliani apeqqutinut akissutit kalaallisut qallunaatullu piaartumik tiguneqarnissaat Ataatsimiititaliap qinnutigaa. Akissuteqaatit qarasaasiakkut assilineqarneri ataatsimiititaliap allattaanut mika@ina.ala.gl-imut aamma Inatsisartut mailiannut inatsisartut@inatsisartut.gl-imut nassiuteqquneqarput.

Qujareerluta,

Ilaqutariinnermut Peqqissutsimullu Ataatsimiititaliaq sinnerlugu
Inussiarnersumik inuulluaqqusillunga

Mala Høy Kúko
Ataatsimiititaliami siulittaasoq